

TEZAU LITURGIC
9 MARTIE

ACATISTUL
SF.40 MUCENICI
DE LA
SEBASTA
ARMENIEI



MOSCOVA, 2000



Акафист

СВЯТЫМ СОРОКА МУЧЕНИКАМ

Севастийским

Кондак 1

Избраннии страстотерпцы Христовы
четыредесяте, во граде Севастийстем чрез огонь
и воду прошедши и в покой вечный вшедши,
песньми восхваляем вас, заступников наших.
Вы же, яко имущии велие дерзновение ко
Господу, от всяких нас бед свободите, любовию
вам зовущих:

Радуйтесь, святии четыредесяте мученицы
Севастийстии, преславнии чудотворцы.

Икос 1

Ангели Божии, хранителие рода
человеческаго, зряще пред мучителем
дерзновенное ваше исповедание Христа, на
подвиг страдальческий невидимо вас укрепляху.
Мы же, ведуще вас, подвиг сей добре
совершивших, радостно взываем:

Радуйтесь, дерзновенным исповеданием Христа возвеселивши Ангелы; радуйтесь, дивным терпением вашим мучителей удививши.

Радуйтесь, страдании вашими диавола посрамивши; радуйтесь, непобедимою силою Христовою противу невидимаго врага вооружившиися и вся злохитрости того на вы и козни победивши.

Радуйтесь, неисчетнаго мученическаго лика украшение; радуйтесь, земныя воинствующия Церкви сильнии помощницы.

Радуйтесь, святии четыредесяте мученицы Севастийстии, преславнии чудотворцы.

Кондак 2

Видя зверонравный мучитель веру мучеников, заключи их в темницу, Господь же благоутробный яве посети Своя рабы, похваляя начаток подвига их и увещевая неослабно оный совершити. Яко токмо претерпевый до конца венчается в Царствии Небеснем и сподобляется со Ангелы пети: Аллилуиа.

Икос 2

Разум божественный от явльшагося вам Христа приимше, утвердитесь в страдальческом подвиге, святии страстотерпцы, и укоризну Агриколая мучителя в похвалу себе вменисте. Сего ради хвалебно вам вопием:

Радуйтесь, разум правый боговедения стяжавшии и волю свою воле Божией всецело предавшии; радуйтесь, вся прелести мирския и славу воинскую ради Христа ни во что вменившии.

Радуйтесь, ласканий мучителя не послушавшии и грозных того прещений не убоявшиися; радуйтесь, темничное заключение ради Христа претерпевшии.

Радуйтесь, Спасителем мира во узах посещения, благими словесы от Него утешеннии и на подвиг укрепленнии; радуйтесь, яко с верою вас почитающих в скорбех утешаете и от бед избавляете.

Радуйтесь, святии четыредесяте мученицы Севастийстии, преславнии чудотворцы.

Кондак 3

Сила Вышняго содела вас, страстотерпцы святии, сильных в слове пред нечестивыми, темже не терпя дерзновения вашего, гордый мучитель паки в темницу вас вверже, в нюже радостно текосте, поюще Богу: Аллилуиа.

Икос 3

Имуще, страстотерпцы, в темнице сострадальца вашего Кириона блага себе учителя, укрепляесте в вере Христовой и по днех осмих ведени бывше на судище, безбоязненно предстасте Лисию-князю и Агриколаю-воеводе, мудре обличисте их нечестие. За таковое ваше дерзновение приносим вам сицевыя хвалы:

Радуйтесе, в броню веры Христовой облеченнии и щитом благодати Его покровеннии; радуйтесе, единого Христа паче всех возлюбившии и ради Его повеления беззаконная мучителей презревшии.

Радуйтесе, силу Христову пред нечестивыми проповедавшии и всемогущество Божие яве показавшии; радуйтесе, яко и каменная метания вам не прикасахуся.

Радуйтесе, яко та силою Божию на метающих я возвращахуся; радуйтесе, яко и ныне молитвами вашими к Богу вражия стрелы от нас отражаете.

Радуйтесе, святии четыредесяте мученицы Севастийстии, преславнии чудотворцы.

Кондак 4

Бурею злобы противу Христа дыша, гордый Лисий третицею вверже страдальцев в темницу, в нейже паки Христос явился, утешая, ободряя их и нетленные венцы в Царствии Небеснем обещаваая, они же сия слышавше, радостно пояху Богу: Аллилуиа.

Икос 4

Слышавше мучителие твердое страсотерпцев Христа исповедание, осудиша я на всенощное в хладнем езере стояние, они же огонь любви Божественныя в сердцах имуще, не убояхуся лютаго мраза, но, единомушно славяще Бога, идоша на страдание. Мы же, терпению сих чудящиеся, зовем сице:

Радуйтесе, добропобеднии Христовы исповедницы; радуйтесе, кумирослужения низложителие.

Радуйтесь, терпением лютаго мучения в покой вечный вшедшии; радуйтесь, болезнями страданий обретшии неизреченная блага.

Радуйтесь, драгии и крепции четыредесяте камене; радуйтесь, Церковь Христову собою укрепляющии и осиявающии.

Радуйтесь, святии четыредесяте мученицы Севастийстии, преславнии чудотворцы.

Кондак 5

Боготечнии звезды Христовы явистесе, святии, в ноцнем хладе во езере Севастийстем сияющии, ихже не прельсти теплая баня соблазна, но со Ангелы Богу пояху: Аллилуиа.

Икос 5

Видевше святии, яко един от них отпаде, убоявся мраза ноцнаго, и скрыся в теплой бане и абие умре, тепле взываху ко Господу, да их укрепит в подвизе страдания и прославит имя Свое. Мы же зовем вам сице:

Радуйтесь, славнии победоносцы, вся козни сопротивных победившии; радуйтесь, всю ноцъ нази во езере стоявшии.

Радуйтесь, единокорно тамо Господа призывавши; радуйтесь, яко в терпении вашем помощь скорую Господь низпосла вам.

Радуйтесь, яко свет Божественный осия вас; радуйтесь, венцы пресветлии с Небесе приявши.

Радуйтесь, святии чотыредесяте мученицы Севастийстии, преславнии чудотворцы.

Кондак 6

Проповедницы дивнаго чудесе, стражие, в бани бывшии, поведаша, како в ноци свет Небесный во езере облиста мученики, лед растопи и хлад в теплоту преложи, еже слышавше, мучителие паче злобою распаляхуся, не ведуще Богу пети: Аллилуиа.

Икос 6

Воссиявшу во езере свету Небесному, воссия и в сердце единого от стражей благодать Божия, яко той совлекше ризы своя, ввержесе во езеро ко святым мучеником, восполняя место отпадшаго; и тако посрамися князь тьмы, ликовавый о умалении лика страдальцев, имже мы ныне вопием таковая:

Радуйтесь, Христовы страстотерпцы, молитвами и терпением вашим веселие диавола в печаль обративши; радуйтесь, от злобы и коварства его верныя избавляющии.

Радуйтесь, в хладе воды благодатию Святаго Духа просветившиися; радуйтесь, стоянием вашим во езере мысленнаго змия главу сокрушившии.

Радуйтесь, полная четыредесятнице, Христу бодренно представшии; радуйтесь, верою и страданием ради Христа блаженство райское унаследовавшии.

Радуйтесь, святии четыредесяте мученицы Севастийстии, преславнии чудотворцы.

Кондак 7

Хотяще чуднии страдальцы веру во Христа непорочно сохранить, славу воинскую и ласкания мучителей ни во чтоже вменисте, и вся лютая мучения, аки безплотнии, претерпесте, поюще Богу: Аллилуиа.

Икос 7

Новое и последнее святии прияша мучение, яко голени их сокрушени млатами быша, и тако скончаша подвиг страдания, прияша от Бога

нетленные венцы. Темже возглашаем в похвалу им сице:

Радуйтесь, прекраснии леторасли сада Иисусова, не секирами, но млатом посеченнии; радуйтесь, сосуды благодати Божией за имя Христово сокрушеннии.

Радуйтесь, страдальческий подвиг славно скончавшии; радуйтесь, от ликов Ангельских в сожителство приятые.

Радуйтесь, от пророк и апостол, яко тех последователие, прелюбезно сретенные; радуйтесь, рода христианскаго слава великая.

Радуйтесь, святии четыредесяте мученицы Севастийстии, преславнии чудотворцы.

Кондак 8

Странную доблесть показа чудная мать святаго Мелитона, видяще бо телеса мучеников везома на сожжение, своего же сына еще жива суца, взя на рамена своя, и той испусти дух свой Богу, поя: Аллилуиа.

Икос 8

Все зверонравие проявиша мучители, егда повелеша святыя телеса мученик сожещи огнем

и прах их в реку вовреци, да истребится от земли память их, обаче посрамишася; Господь же в роды вечныя прослави я пред Ангелы и человеки; сего ради зовем им:

Радуйтесь, по словеси псалмопевца чрез огонь и воду прошедши; радуйтесь, стражем Христовым общницы.

Радуйтесь, врагов Христа низложителие; радуйтесь, ко Господу за христианы предстателие.

Радуйтесь, верныя во правоверии утвердивши; радуйтесь, неусыпныя молитвенницы за род христианский.

Радуйтесь, святии четыредесяте мученицы Севастийстии, преславнии чудотворцы.

Кондак 9

Вси христиане зело удивишася, яко кости святых мученик чудесно нощию в реце яко звезды просияша, и, честно собрани, по повелению святых, неоскудныя верным исцеления подают, да поем Богу: Аллилуиа.

Икос 9

Вития древний пророчески, Божиим Духом озаренный, о кончине верных во псалтири пояше: «Пройдохом сквозе огонь и воду, и извел ны еси в покой». Вы же, святии мученицы, делом сие исполниша. Сего ради примите от нас похвалы сицевыя:

Радуйтесь, соблюдшии до конца веру Христову; радуйтесь, страдания вашими, яко злато в горниле, очистившиися.

Радуйтесь, предстателие великии к Богу, от бед нас спасающи; радуйтесь, в скорбех нам помогающи.

Радуйтесь, ко спасению душ нас наставляющи.

Радуйтесь, святии четыредесяте мученицы Севастийстии, преславнии чудотворцы.

Кондак 10

Спасению нашему споспешницы есте, святии страстотерпцы, темже усердно к вам прибегаем: помозите нам вашим предстательством ко Господу остающее время нашего жития в покаянии проводитьи и всегда благодарно Богу взывати: Аллилуиа.

Икос 10

Стеною молитв ваших оградите нас, святии мученицы, от всяких зол и козней вражиих, да охраняеми вами, ублажаем вас сице:

Радуйтесь, Кирионе, Кандиде и Домне, Божественнаго Писания наставницы; радуйтесь, Агнине и Аетие славнии, на Небо духом возлетевшии.

Радуйтесь, Афанасие, Аглаие, Вивиане и Горгоние, Христа Бога возлюбившии; радуйтесь, Екдите, Гаие, Евноикие, Евтихие, Дометиане и Иоанне, души своя за Христа положившии.

Радуйтесь, Исихие, Ираклие, Кирилле, Клавдие, Лисимахе и Леонтие, небесная блага получившии; радуйтесь, Илиане и Илие, пророку Илие поревновавшии.

Радуйтесь, святии четыредесяте мученицы Севастийстии, преславнии чудотворцы.

Кондак 11

Пение хвалебное приносим вам, святии мученицы, яко любве ради Христовы плоти своея не пощадисте. Темже и память ваша, яко пресветлый светильник в Церкви сияет, верных духом озаряя, поющих Богу: Аллилуиа.

Икос 11

Светом небесным осиянных зрим вас,
преславнии страстотерпцы Христовы, Престолу
бо Пресвятыя Троицы выну предстоите и о мире
молитвы со дерзновением приносите; темже
хвалебная вам взываем:

Радуйтесь, страстотерпцы Христовы Николае,
Приске, Смарагде, Сакердоне, Севериане и
Сисиние, злобы вражия победителие; радуйтесь,
Филоктимоне и Феофиле, любви Божественныя
совершителие.

Радуйтесь, Худионе, Ксанфии и Флавие,
воини Христовы премудрии; радуйтесь,
Мелитоне, Феодуле и Валенте, раби Бога
преславнии.

Радуйтесь, Христовы мученицы Валерие,
Александре и Акакые; радуйтесь, весеннюю
памятию вашею нам весну Христову
возвещающии.

Радуйтесь, святии чотыредесяте мученицы
Севастиисти, преславнии чудотворцы.

Кондак 12

Благодатию обильно исполняется обитель
Ксиропотамская, имущи честныя останки ваша,

преславнии мученицы и чудотворцы, темже и нас, память вашу светло совершающих, благодати Божия молитвами вашими исполняйте, да поем чудес подателю Богу: Аллилуиа.

Икос 12

Поюще честная страдания ваша, святии мученицы, прославляем Господа, вас укрепившаго и венцы нетленными венчавшаго, и яко теплых заступников и ходатаев за род христианский, ублажаем сице:

Радуйтесь, звезды Небесныя от Севастии возсиявшии; радуйтесь, яко луна духовная, на Небо от земли возшедшии.

Радуйтесь, яко солнце мысленное, наша скорби просвещаете; радуйтесь, яко в трудех поста и молитвы нас утешаете.

Радуйтесь, четыредесяте крепции столпы Христовы Церкви; радуйтесь, всех верных хранителие и защитницы.

Радуйтесь, святии четыредесяте мученицы Севастийстии, преславнии чудотворцы.

Кондак 13

О святити страстотерпцы Севастийстии, лести лукаваго славнии победоносцы, предстательством вашим у Господа испросите нам победу на душевредныя страсти и гордость житейскую, да в покаянии поживше, Небеснаго Царствия сподобимся, поюще Богу: Аллилуиа.

Этот кондак читается трижды, затем 1-й икос «Ангели Божии...» и 1-й кондак «Избранныи страстотерпцы Христовы...»

Молитва

О, святити, славнии страстотерпцы Христовы, четыредесяте, во граде Севастии Христа ради мужественно пострадавшии, чрез огонь бо и воду проидосте и, яко друзи Христовы, в покой Небеснаго Царствия вшедше, имате велие дерзновение ко пресвятей Троице ходатайствовать о роде христианском, наипаче же о почитающих святую память вашу и с верою и любовью вас призывающих. Испросите у Всецедраго Бога прощение согрешений наших и жития нашего исправление, да, в покаянии и нелицемерной любви друг ко другу поживше, со дерзновением предстанем Страшному Судищу

Христову и вашим предстательством одесную Праведнаго Судии предстанем. Ей, угодницы Божии, будьте нам защитницы от всех враг, видимых и невидимых, да под кровом святых ваших молитв избавимся от всех бед, зол и напастей до последняго дне жизни нашея и тако прославим великое и достопоклоняемое Имя Вседетельныя Троицы, Отца, Сына и Святаго Духа, ныне и присно и во веки веков. Аминь.

